

M/s ROSEWOOD HOSPITAL, SARON VENG, AIZAWL A DIN TUR CHUNGCHANGA PUBLIC
HEARING REPORT KIMCHANG

A hmun: YMA Hall (Saron Indoor Conference Hall)

A hun: 20.11.2018 dar 11:00 am

Sawihawna :

Ministry of Environment, Forest & Climate Change, Govt. of India-in lehkha No S.O. No. 142(E) Ni 17.04.2016 hmangin "Damdawi in bawlhhlawh sawngbawlna hmun (Bio-Medical Waste Management Facilities) zawng zawngin damdawi in din hmaa Environmental Clearance an mamawh ang' tiin thuchhuah a siam a. Hetiang damdawi in bawlhhlawh sawngbawlna hmun te hi Category B1 projects niin, Mizoram SEIAA/ SEAC hnuaia a dilna siam tur chi an ni.

Mizoram ah hian Common Bio- Medical Wastes Treatment Facilities din a la nih lo avangin, Rosewood Hospital, Saron Veng, rilru lama harsatna enkawlna damdawiin pawh hian an damdawiin bawlhhlawh chu anmahniin an sawngbawlin an thehthang a tul a. Chuvangin, he damdawiin hian Sorkar thuchhuah angin Air (Prevention & Control of Pollution) Act, 1981 leh Water (Prevention & Control of Pollution) Act, 1974 hnuaiah Pollution Control Board atanga phalna neih hmian Environmental Clearance neih a ngai a ni. He damdawi in hian Bio- Medical Wastes Management Rules, 2016 in a phut anga an damdawi in bawlhhlawh sawngbawl leh thehthang an tum a ni.

Ni 20.11.2018 (Thawlehni) dar 11: 00 AM khan Saron Veng YMA Hall (Saron Indoor Conference Hall) ah Rosewood damdawi in din chungchangah vantlang inkhawm neih a ni a. He inkhawm hi Dr. Lalhriatzuali Ralte, IAS, Addl. DC (E), Aizawl chuan a kaihruai a. A ni hian mipui ten he damdawi in a lo din a, mihring hriselna atan leh kan khawtlang leh a chhehvel leilung leh min hualveltu environment eng angin nge a khawih pawh dawn tih sawiho tura he vantlang inkhawm hi buatsaih a nih thu a sawi a. Tin, dan hrang hrang Environment Protection Act te, leh a hnuaia dan teseq (Rules) Bio Medical Waste Management Rules, 2016 te, 2018 amendment rules te hmangin he hearing hi neih ngei ngei a ngaih avangin he vantlang inkhawmna hi buatsaih a ni a. Tin, danin a phut angin he inkhawm hi DC emaw Additional Deputy Commissioner aia hniam lovin a kaihruai tur a ni a, Election thilah kan Deputy Commissioner, Dr A. Mathumma, IAS hi a buai avangin a ai

awh lo kal a nih thu a sawi bawk. Tin, he damdawi in din tur hi, rilru lama harsatna neite enkawlna tur anih avangin damdawi in dang angin bawlhhlawh sawngbawl tur an neih vak a rin loh thu a sawi rualin damdawi in bawhlhawh te enkawl that a tul thu leh mipui te pawhin kan enpuizui a tul thu a sawi bawk. He public hearing hi mipui tena zawhna leh rawtna an neih te sawiho nan a danin a siam thu leh, he inkhawma thil sawihona leh rawtna te chu report angin SEIAA hnena submit leh tur a nih thu a sawi bawk. Hetiang a nih avangin Vantlang inkhawm hi ngaih pawimawh a ngaih rualin, a duh aia mipui kalkhawm kan tlem thu sawiin pawl a tih thu a sawi. Hetiang hi sorkar pawn kan neng vara, hma kan lak a ngai a ti bawk.

Chairperson hian officials leh khawtlang aiawha lo kal te inhmelhriattirna a neih hnuin vantlang inkhawm tan a ni.

Chairperson-in a sawm angin Pi P.C. Lalmanpui, AEE, Mizoram Pollution Control Board chuan inkhawm kalpui dan tur tawi fel takin a sawi a. Vantlang inkhawm neih a nih dan, project lian ten Environmental Clearance an mamawhna kawnga tih tur hmasa leh mipui te chanvo, kan ngaihawh zawng te kan sawi theina hun a nih thu te, ni tiam chhunga chanchinbu leh local TV hmanga puan zar a nih thu te sawiin, vawin inkhawmnaa kan thu sawi te chhinchhiah a nih dan tur a sawi fiah a.

Chumi hnuah Rosewood Hospital chungchanga Power Point presentation nei tura Chairperson-in a sawm angin Pu AC Zonunmawia, Consultant, Rosewood Hospital chuan hospital chungchang hetiang hian a sawi.

Pu AC Zonunmawia chuan Bio- Medical Waste Management Rules, 2016-in a phut angin damdawi in bawlhhlawh sawngbawl vek a ni a; bawlhhlawh an thliar hran dan te, sawngbawl dan te leh an thehthang dante sawiin damdawi in blawhlhawh plastic tih loh chu Zemabawk, KTP ram bulah khur ft 6×3×6 a thukah thehthang vek a ni tih a sawi a. Damdawi in tuichhia erawh chu damdawi (bleaching powder) a chiah a nih hnuah filter a ni a, chumi hnuah lui kawrah luntir a ni tih a sawi bawk. Thisen/ zun test erawh hi chu pawn lam laboratory-ah (Genesis laboratory) pek chhuah vek a ni a ti. Damdawi in bawlhhlawh sawngbawl lam enfiah tu tur bik Waste Management Officer leh Waste Management Team an awm thu sawiin tuna hospital din tur hi rilru lama harsatna nei te chauh enkawlna tur a nih avangin damdawi in dangte aiin bawlhhlawh pawh hi an neih tlem tur thu a sawi bawk.

Presentation hnu hian Chairperson chuan mipui te chu rawtna emaw thurawn emaw an neih te sawi turin a sawm a. Mipui ten a zawhna leh rawtna bakah hraitfiah duh an neih te chu Rosewood Hospital thuneituten an sawifiahin an chhang nghal a, hetiangin.-

1. Pu C. Lalmalsawma, Asst. Town Planner, AMC: "Rosewood Hospital hian AMC atanga permission an neih tawh sa hi Residential building atan a ni a, tunah Hospital din nan a nih tak avangin Institutional permission an lak a ngai dawn an tin, AMC Building Regulations tul leh mamawh a tih ang zawng zawng tih that a ngaih bakah building drawing pawh ennawn (revise) a thehluh tel a ngai dawn a. Hospital thuneituten lo bawh theih ni se.

2. Pu F. Rochama, Vice President, Saron Veng Branch YMA:

"Damdawi in din a nih dawn a Khuangchera section, YMA, Saron Veng Branch in a bik taka damdawi in bawlhhlawh (Bio Medical Waste) sawngbawl that a nih loh chuan khawtlang tan mai bakah thlanglama tuikhur tan a hlauhawm theih an hlauh thawn thu Branch Committee, Saron Veng ah kan lo thlen tawh a. Tichuan damdawi in bawlhhlawh hi anmahniin an zu paih mai em ni? A paihna Khur te kha an siam tak tak em? Tui chhia thlitfimna tur hmun te kha a takin an siam em? Tin, hospital atanga tuichhia lo chhuak hian kan veng a lui te (stream) hi a tibawhlawh ang em? Tin, khawi luite berah hian nge hospital tuichhia an paih?".

- Dr. Vanlaldiki, Rosewood Hospital: *"Bawlhhlawh reng reng hi Zemabawk ramah 6X3X6 ft a thukin kan lai khuar a, chutah chuan kan paih zel a ni. Tin, hriau te pawh kan fimkhur lutuk a, entirnan kan silfaina te pawh hi kan paih mai lo a, kan tihthianglim phawt a, kan paih a ni. Chumi kan tihthianglim na tui pawh kha kan tihthianglim nawn(filter) leh phawt a, chumi hnua chauh chuan kan paih a ni. A dang thil eina plastic kawr ang chi kha chu AMC bawlhhlawh phurah kan paih mai a; amaherawhchu mipui tana hlauhawm thei tur IV set te, hriau te, syringe te chu kan tihchhiat vek hnua leh gloves te phei chu kan tihthianglim vek hnua kan chep sawm vek a, tichuan kan huan/ramah kan paih vek a ni. Englai pawhin hmuh theihin a awm reng a ni. Chumai nilo in kan thil paih kha a khat tawkin cement chawh diak in kan leih leh thin a, a lo char ta vek thin a ni. Chu chu mihring tan, Zemabawka cheng te tan pawh a hlauhawm loh a ni. Dan ang चाहin kan kal a, engmah hlauhawm tur a awm lo. Bawlhhlawh kan sawngbawl dan hi engtiklai pawhin damdawi inah sawn en theih in a awm reng a*

ni. Thisen test, zun test leh a dangte hi Saron veng damdawi inah hi chuan kan ti lo, Genesis Laboratory ho hi ni tin vawi hnih vawithum te an lo kal thin a ni. Drip kan khai a, therapy kan ti bawk a, chung tih lohah chuan Bawlhhlawh tam tak hi kan siamchhuak vak lo”.

Mipui lam rawtna angin Dr Vanlaldiki chuan *“Tuichhia paih dan hi Local Council te nen kan en ho zel ang”.*

3. Pu T.C. Thanzuala, Member, Local Council, Saron Veng: “Hospital ding lai khi zauh belh leh a ni dawn em? A nih dawn chuan eng nge ruahmanna a neih?
- Dr. Vanlaldiki, Rosewood Hospital: *“Damdawi in zauh belh tumna kan nei lo”.*

4. Pu Z.Lalnunmawia, Asst. Secretary, Khuangchera Section, YMA, Saron Veng Branch:
a) “Nakin zelah Hospital a lo changtluna a lo indin ngheh deuh hunah tlawhtu avangin parking lamah engnge ruahmanna an neih? Tunah hi chuan dropping zone neih pawh a la buaithlak si a”.

b) “Presentation ah khan fire extinguisher kha chhuatah a awm tawp mai a, khang te kha chu tu pawhin engtik lai pawh a lak bo mai theih kha a nih hmel a, khatiang Fire fighting equipments ho kha fel fai zawk a dah theih a ni em?”

c) “Damdawin atanga tuichhia ho kha tui luankawrah luan tir tih khan in rawn sawi a, khawi tui luan kawrah nge in luan tir? A chhan chu helai tui luankawr hi drain mumal vak lo a luang thla in, ‘kawzawl’ kan tihah khuan a pheih leh maia, in tuichhia te hi a kal ve mai emi ni?”

- Dr. Vanladiki, Rosewood Hospital” :

a) *Rilru lam fel lo te enkawlna hmun kan nih angin Confidentiality hi kan vawng nasa lutuk a, in tlawh hi kan phal lo ang tluk a nih avangin a lut leh chuak hi an awm mang lo a. Chhungte pawh vawi hnih khat bak hi tlawh kan phal lo a, chuvangin parking chungchangah chuan hun lo kal zel turah buaina kan neih ka ring lo. A thawktute (keimahni) ho hi kan ni deuh mai a. Tin, Damlo buaithlak deuh, rei deuh awm ngai te an awm chuan keimahni parking space Baptist Biak In bulah hian kan tlan luh tir ve mai thin a ni.*

b) *Fire extinguisher kha chu thlalak lai khan kan la thla a, bangah dah vek ani a, Emergency Fire exit hi keini pawhin kan ngaipawimawh khawp mai a, pahnihah tal awm sela kan ti a, chumi tur chu tunah hian plan siam mek a ni bawk*

c) *Bawlhhlawh chungchangah chuan damdawi in kan siam tirh dawnah khan Local Council member leh YMA thenkhat ten en sawihoin, in duh dan in kan ti a. Helai pipe zawng zawng kha la khawmin pipe hranin kan la a, Pi Zaiite in paltlangin Main kawr kan tih maiah khuan kan luan tir a. Helai step bula tui lo luang hi chu kan choka a mi bik chauh a ni. Damlo inbualnate, insuknate chu engmah helai atang hian a lo chhuak lo. Kan rawngbawlna tui chauh a lo chhuak a ni.”*

5. Pu Z. Lalnunmawia, Asst. Secretary, Khuangchera Section, YMA, Saron Veng Branch:
“Tunhma in he building atanga septic tank/ ek in tui leak avanga khawtlang in harsatna kan lo tawh tawh avangin, hospital ten hemi chungchangah hian ruahhmantha zawk an nei em? “

- Dr. Vanlaldiki, Rosewood Hospital: *“Kan lo en dawn nia”.*

6. Pu Z. Lalnunmawia, Asst. Secretary, Khuangchera Section, YMA, Saron Veng Branch
“Hospital Quality Control leh implementation chungchang ah hian Pollution Control Board lamin Checklist fel fai tak in nei em?”

- Pi PC Lalmuanpuui, AEE, MPCB: *“Aw. Bio- medical Waste Management Rules, hmang in damdawi in zawng zawng hi endik thin a ni a. Tunah erawh Rosewood hospital hian Environmental Clearance an dil mek a ni a, EC an neih theih chuan Board-in terms and conditions fel tak nei in phalna pek chhuah theih chauh a nih tur thu a sawi. Tin, Aizawla damdawiin ho phei chu kum khatah hian kan endik ngei ngei a bawk thin. Hemi kawngah hian mipui te hi an pawimawh a, inspection neih pawh hian mipuite an lo aware chuan hna a thawk chak em em a, Min thawhpui tur in ka sawm nghal che u”.*

7. Dr. Lalhriatuali Ralte, IAS, Additional DC (E), Chairperson :

“Nichina tuichhia paih leh ek in leak chuangchanga hospital in an sawi kha a Chiang zawka engtin nge hospital in hmalak in tum?”

- Dr. Vanlaldiki, Rosewood Hospital: *“Chutiang a thlen loh nan hma kan la ngei ang”.*

Dr. Lalhriatzuali Ralte, IAS, Additional DC (E), Chairperson: “Bawlhhlawh khawiha sawngbawltute invenna hmanrua hmai kawr, kutkawr, apron leh a dangte a thuam that an pawimawh thu leh hemi kawngah hian kan fimkhur tlan theuh a tu!”.

Chairperson-in a sawm ang in Pi PC Lalmuanpuii’n Minute a chhiar chhuak a siam that ngai te siam hnuah Minute sign nghal a ni.

He vantlang inkhawm hi Pi. K. Lalrinsangi, Rosewood Hospital in lawmthu sawina a neih hnuah Inkhawmna kaihuai tuin a ti tawp ta a ni.